

退補齋詩存二編

退補齋詩存二編序

歲之仲秋胡月樵都轉來閩寓節署之桐蔭堂與

紹昌

寓齋近琴歌酒坐過從甚歡出示退補齋詩文集瀕行復出近作詩文屬訂將刻爲二編而命

紹昌

序其詩竊

念都轉之詩王子壽比部孫琴西方伯諸公已序之比部謂都轉詩敏且工其本皆出於忠孝之數語者盡之矣復何言雖然詩境以時而異此二編者半皆都轉歸田以後之作也嘗觀當代賢公卿名位既隆莫不欲還政避賢幡然作反畊之計而往往不得自行其志都轉

以觀察需次於鄂甫權糧道策卽拂衣歸故里攬金華
三十六洞之勝築室而居翫煙霞而狎魚鳥著書教子
優游自娛暇則尋水望山或出訪諸知好道素志論舊
款以爲樂風颺落落希蹤古人宜其詩之日進而不能
自己也雖然都轉當解組之時大憖甫平海內清晏故
得以徜徉林壑吟白傳閒適之詩今則邊垂多事鑿空
乘障中外騷然此賈生所謂積薪抱火之秋而謀夫猛
士定策立功之會也都轉前以駕部郎在都隨諸王大
臣治園營又出而游皖游楚佐軍事調兵食皆著有勞

續一旦羽書四馳其能如汜無忌之門一杜不復開也
乎他日短衣匹馬驅十萬橫磨劍馳騁於天山瀚海之
間白草黃沙雪花如掌酒酣耳熱高歌從軍出塞之曲
破陣歸來且更譜爲鐃吹吾知忠孝所激發固不徒其
詩之敏且工而其詩之敏且工亦必有異於此時者
紹尤欲得而讀之且序之也光緒六年十二月香山黃
紹昌謹序於榕城節署

退補齋詩存二編總目

卷首

卷一

同治癸酉至
光緒乙亥

古體詩十八首

卷二
乙亥

古體詩十八首

卷三

丁丑

古體詩九首

卷四

戊寅己卯庚辰辛巳

古體詩二十九首

卷五

同治癸酉

今體詩六十首

卷六

同治甲戌
光緒乙亥

今體詩四十七首

卷七

丁丑

今體詩六十四首

卷八

丁丑

今體詩四十二首

卷九

丁丑戊寅

今體詩二十三首

卷十

庚辰

今體詩七十首

歸田老人六十小像

貞女雲璈學繪



貌亦魁頽心亦質樸口無聶嚅性更
堅卓當卅歲之韶華歷九州之水陸
燕楚廿年清風一握六十歸田鬢毛
半禿問吾生之嗜好惟曰耕而曰讀
以仁義為菑畲以詩書為菽粟吾守
吾真吾行吾素際此暮年依然韋布

歸田老人自贊金華黃世瑩述齋甫書

評語

伏誦大什性情所得矢口成音紀行感懷如示諸掌尤
妙在抒寫天機不誇工麗於采色聲音而一掃氣矜自
負之習不禁於此歎觀止矣其精警處任讀者之各自
領取不欲以管窺囿之也同治癸酉嘉平二日海甯何
國琛白英甫識於鄂垣之腐廬

研情比象觸手生春近作駿發踔厲腴不掩骨鍊不傷
氣一字一句皆出常境想見據鞍顧盼時較之灞橋驢
背上興復不淺也同治甲戌人日江夏張凱嵩粵卿識

於復園之南榮

近作與前刻大集詩境又不相同蓋江山之助旣多塵
海之勞復屏心以靜妙文由情生行路之中增長學力
如此拜服拜服江夏彭崧毓漁叟識

閔闊疎宕是作者本來面目此數卷於閔闊之中出以
謹嚴疎宕之中加以道鍊少陵云老去漸於詩律細茲
於大箸信之甲戌新正三日平湖張炳堃鹿仙甫識於
鄂垣旅次

退補齋詩存二編目錄

卷一

古體詩

癸酉赴都家中話別 北上放歌

七月十四夜抵皖城簡琴西廉訪

別孫琴西 游皖城東門迎江寺有感

別王與軒觀察 舟過蕪湖懷鄂中同人

京口渡江 淮安阻風

清江卸舟 羊流早行

磚河阻風

中秋日流河舟中有感

別王丹亭

題劉綱甫岷雲樓續集

水仙茶花

退補齋詩存二編卷一

癸酉 甲戌 乙亥

古體詩

永康胡鳳丹月樵

癸酉赴都家中話別

僕夫催風駕登堂辭父母父母雖云亡出告禮必守兒
今遠行役持家賴有婦有婦儉且勤宅心尤篤厚視妾
如姊妹旦暮隨左右兒女列成行督課無先後子婦識
孝敬堂前執箕帚瀕行傾一觴難盡此杯酒侍妾默無
言吞聲不出口徘徊復徘徊臨歧屢回首

稚子牽我衣雛孫執我御依依不忍離至性天所付丈

夫多愛憐慈心如老嫗大兒歸武林志切秋闈赴次兒
理家政畧能識時務三兒讀爾雅質性頗穎悟四兒今
六齡亦讀說文注往往求甚解疑難問師傅我去秋初
涼我歸歲云暮行矣兒在家平安寄尺素

北上放歌

鄂渚去京四千五百八十里茫茫四顧秋風起有客送
我江之涘欲別徘徊情難已倚裳聯襪登高樓二三吾
黨舊知己陸彥願約彭器之王子泉祖餞於漢皋之一品香樓隔座忽聞絲竹聲
大絃小絃喧入耳使我聆之心骨悲當筵誰是知音子

黃金買笑揮泥沙，纏頭僅博蛾眉喜。
誰識阮籍泣窮途，空囊羞澀貧如洗。
撮土難成平地山，涓滴奚補江河水。
摒擋衣履強成行，昔日朱顏今暮齒。
集蓼茹荼家苟完，又痛荆花一枝萎。
竹溪伯兄於閏六月十六日去世
大厦安能一木支，債臺竟似高山峙。
爲貧而仕仕仍貧，勢成騎虎難中止。
葵藿聊表傾陽心，夢繞觚棱離尺咫。
一別長安忽十年，雪泥鴻爪紛難紀。
邯鄲道上黃梁炊，明日登程夢方始。
呵壁且勿問青天，持杯聊與傾綠螳。

七月十四夜抵皖城簡琴西廉訪

時任安徽按察使

朝辭黃鵠磯暮飲皖江水海舶何迅速一日走千里況
遇石尤惡艤不能駛獨讓輪舟飛晝夜靡停止仰視
明月高又聽秋風起計候夜將半獨立江之涘阮生歎
途窮我今胡類此踟躕復踟躕天涯有知己知己不我
遺呼僮款行李

琴西廉訪遣僕出城迎接

一人縱陽門鷄聲已盈耳

別孫琴西

去冬游白下君治夙沙政今秋來皖江柏府懸明鏡決
獄多平反爲民輒請命遙聽來暮歌輿論有公評我生
泛萍梗霜雪催兩鬢聽鼓楚江頭八年貧兼病今復踏

輭紅豈爲功名競欲歸無可歸松菊荒三徑

昨日晤君面歡笑情何親今日與君別握別語酸辛天

涯秋草綠萋萋愴我神白露送早寒

是日十六白露節

西風辭

故人願盡一杯酒東下大江濱歲月去如駛遑問百年

身惆悵燕臺遠素衣化緇塵此行計殊拙徒爲猿鶴嘆

游皖城東門迎江寺有感

步出樅陽門言尋迎江寺孤塔聳雲霄巖石積蒼翠慈

雲高閣外荒蕪饒隙地昔讀吳公疏請帑邀帝賜白

金一萬兩煌煌大布施

吳竹莊方伯署皖撫時奏請帑金重建斯寺

那知功

德水祇以飽漁利苔蘚盈空階山門日扃闕忽見僧雛
來語言若夢寐贈以寶訓書不識一丁字余出禪林寶訓二冊贈之
而彼竟不知也嗚呼象教衰何由振廢墜可憐經始人前功盡
捐棄沙門何所裨請觀天下事

別王與軒

思沂觀察時任安廬
滁和道

憶昔燕臺共樽酒我飲一杯君一斗雄才落拓不可羈
輪鐵消磨忍回首我與君別今十年楚尾吳頭各一天
每逢佳節通尺素長江浩渺生雲烟天涯芳草秋更綠
喜聽蛩聲斷復續故人相約飛羽觴君與壽山方伯
招飲思補齋中醉

歸漫唱離筵曲離筵一曲向君彈須賈方知范叔寒獵
獵西風逼人緊可憐索米向長安

舟過蕪湖懷鄂中同人

海嶠日初上侵曉來蕪城不見秋色綠但聞澎湃聲江
水隨我飛青山挾我行攬勝愜幽抱名利無重輕況際
深秋節獵獵西風鳴睠懷同舟侶難忘車笠盟故人隔
千里夢寐時交縈獨坐悄無語惟有鷗鷺迎遙看城外
山脈脈皆含情

京口渡江

長江滾滾聲怒號風聲水聲何刁騷江流到此莽無際
但見兩點浮金焦焦山寺外山荒煙滿目撐蓬蒿金山
山中寺蛟龍出沒翻波濤二十年前曾到此江上不聞
飛海艘今看輪舟排巨浪橫行萬里恣游翺吁嗟乎白
門楊柳秋未凋瓜戍旌旗猶飄搖我今挂席泛溟渤雲
天淘淘水滔滔舉杯試問東流水今古英雄幾浪淘渡
江快擊祖生楫仰視明月江天高

淮安阻風

朝起望南風南風不一週暮至望南風南風何處去維

揚之清江盈盈一水路計程三百里雲帆不能御榜人
負絳行沿堤急奔赴努力屈其躬不敢掉頭顧側見下
水船順風偏相助彼蒼本無私順逆各有數鸞鷟江上
鴻停拳水邊鷺人胡獨不然莫怨北風誤靜坐舟中思
何妨退一步

清江卸舟

袁江解纜東門頭南岸北岸水分流晚潮初上榜人喜
攬金伐鼓爭開舟昔赴京華曾到此兩地茅廬接邇迤
榆柳成行千百株濃陰交互綠於水世變滄桑不可論

紅巾十萬如蜂屯墟落荒涼半灰燼遺黎輾轉幾生存
豺狼剪滅將十載拔幟防兵尚成隊或曰中原無干戈
秣馬裹糧出關塞關塞烽烟何日消萬里從征路迢遙
邊笳嗚咽聲淒絕況遇寒風秋正驕側聞東道多狐兔
滿路荆榛未盡去喜看樽桑日影紅青天萬里撥雲霧
東路時有劫案近
派步兵護送行旅

羊流早行

西風撲面冷侵骨千巖萬壑路難越東道更比蜀道難
森森石齒輪蹄齧袁江八日始到此一寸柔腸摧欲折

遙看泰岱山巖巖壓倒羣峯真險絕道路崎嶇愧偏多
奇峯怪石紛森羅或如牛眠欹澗谷或如虎伏蹲巖阿
或如鰲頭撐突兀或如雞卵堆嵯峨車鄰馬蕭蕭賓
鴻客燕心遙遙石上驅車心欲裂火光迸出輪鐵銷夜
半月明冷於水枕戈欲舞聞雞起奈此馬煩車殆何底
作天涯浪遊子

中秋前一夕磚河阻風

河干皓月明如晝直放扁舟水飛濺惱煞北風連日吹
未能兼程走斥堠寒蛩唧唧鳴深宵明日中秋生早潮

榜人有力不能駛臥聽木葉聲蕭蕭蕭蕭木葉隨風去
游子有家不得住頻年作客如飛鴻楚雨燕雲渺何處
十年不到帝京城葵藿有心向日傾此行卻被明月笑
安得好風相送迎

中秋日流河舟中有感

人間中秋夕天上月圓時月圓何皎潔流暉照房帷堂
前設几席瓜果盈槃匱啞啞小兒女拜月齊揚眉今我
離故鄉遠在流河涯流河水清淺光爭綠玻璃上有青
楊柳絲絲牽我衣下有黃荻蘆秀穗垂離離一聲南來

雁獨立河之湄孤征犯霜露求侶音可悲萬里傳尺素
不敢逾程期舉杯問青天南風不我吹心中無限事惟
有明月知

別王丹亭

饒鳳

平遙王丹亭與我昧平素故人通尺書

謂彭佩雙

一見竟如

故維時赴京華將出青齊路上有永定河水溢德州渡
爲我戒行李逕由津門步俠士重義氣平生不多遇端
人取友端斯言良非誤欲別情依依青園楊柳樹

題劉綱甫

存仁

司馬杞雲樓續集

昔聞君名昧君面十載相思不相見相思猶幸讀君詩
子衡少谷生並時綺歲文章噪宇內鎔經鑄史追先輩
旁參諸子及百家著書日與古人對春風瑁璆黃金臺
詩人昕夕相往來君之吟朋我舊雨

琴西穎叔諸公

愛而不見

心肝摧憶君筮仕來關中羽書絡繹烽烟紅十戶逃亡
九不復磬磬中澤鳴飢鴻兵革不休民不治投筆從戎
佐軍事巧婦爲炊難救貧司農仰屋空揮淚翩然解組
歸無田士民遮道呼青天清風明月充囊橐祇餘篤舊
詩一編

官莊浪同知時刻
篤舊集十六卷

南歸艤棹漢江駟咫尺天涯

交臂失濟川終賴舟楫材

回閩襄理船政有年

談經又傳濂洛術

今王延平講席

我游鵲渚今九年茫茫宦海天無邊願隨子驥

事高尚桃花源裏聽流泉矯矯如君出人表避世不許

紅塵擾梅花野鶴伴林逋

謂穎叔方伯

兩水雙橋懷謝眺

謂枚

如舍人

岷雲樓與靈光侔恨無梯級空凝眸朗誦瑤章口

流沫心香一瓣臨風酬

水仙茶花

光緒紀元花朝前十日小園茶花含苞未放忽

寶珠一樹紅逾瑪瑙離花梢寸許傍開水仙一

朵素瓣黃心清香撲鼻爲生平所未見誠異事
也詩以誌之

我聞枸樓國有水仙樹瓊漿醉飲如仙露又聞古銅洗
藝水仙花仲困作賦相矜誇水仙情性潔於水生平不
受污泥滓銀蒜冰心擎玉盤胡爲曼陀羅樹生連理茶
花種類原尋常竟能拔萃冠羣芳盤根未深不盈尺珊
瑚玉佩凝濃妝湘娥翩翩下湘渚出浴楊妃羣芳譜有楊花茶
與傳侶旁生側挺吐奇葩誰爲天公催羯鼓對花思對
素心人玉茗風流替寫眞鍊丹可是饒仙骨傳粉將毋

賦洛神呼僮洗盞招吾黨如此名花共欣賞莫辨前身
與後身嫩白深紅世無兩回憶同治己巳秋水仙蘭開
歲七周今春凡卉多未發獨有山茶紅於榴久廢吟哦
詩腸槁爲爾涉園起常早撫摹愛翫三歎息絕代佳人
空谷老

方子箴陸慰農孫琴西創議長江詩筒命余首唱
賦此爲第一集

大江東去通金焦酒龍詩虎相招邀衮衮名公誰抗手
當今蘇海兼韓潮愧我齊竿亦濫厠欲結因緣惟文字

恨不聚處同一方北旆南轅各異地一昨曾經白下游

喜逢知己勝封侯半居廊廟半泉石風晨月夕爭唱酬

雄才首屈方君錫筆埽千軍人無敵登壇老將援枹鼓

坐擁百城破堅壁子箴官兩淮運使公暇尤嗜吟咏著有二知軒詩集行世箕山守

節推薛方脫卻朝簪歸梓鄉著作等身關名教豈徒蒙

蔭畱錢唐慰農官杭州太守署杭嘉湖道愛民重士創設東城講舍士民感之今主江甯惜陰書院

講席博學交稱孫叔炳綺歲上書入蘭省文章經濟達

九重日下名流皆引領琴西登詞苑後入直上書房有年擢安慶太守任江甯

鹽道今授皖臬循聲卓著吁嗟乎風雲遇合原有時人生聚散亦何

奇自從冀北十年別萍踪乍合仍乍離我願歲寒結三
友重與論文傾樽酒長江鴻雁相代飛雨雪依依詠楊
柳

和子箴消寒集仿真率會故事原韻聊述鄙懷

丈夫各有志惟窮心益堅宦海殊茫茫那得歸耕隱蹇
驢甘我後怒馬讓人先自知柄鑿拙不能成方圓謠詠
妬蛾眉何敢爭嬖妍楚游歷八載官鼓聞喧闐相如同
病渴謂鹿仙劉寵不選錢菜根有美味咀嚼超簞籩但煮
長腰米遑羨槎頭鱸生平茹素自甘江魚從未入饌矢志朝
君王

趙趙不敢前持重似蝨蠅游行如蠅蚘

久欲北上引見因力薄中

止且拋軒冕榮共參文字禪尺書隔千里吟哦已經年
遙唱江南好杏花春雨天

漢江紀事

二月七日

漢自岷冢趨荆襄江源來自岷山長到此雙流束不住
朝宗東去何汪洋盛夏淫潦水勢高奔騰澎湃掀洪濤
波臣消長無定局隆冬水淺不盈篙我今喚渡來江頭
無數羣鷗拳汀洲龍王廟口下數里沙泥突起如平疇
江畔輕舟行不得水聲嗚咽天無色見說江流海樣深

胡爲江心僅盈尺舟人語我開汭河流沙淤塞水無波
篙師有技不能逞柁樓枯坐徒高歌我聞斯言良有以
世局遷流概如此陵谷滄桑變態多不獨滔滔一江水
吁嗟乎水利水患思難禁深者就淺淺者深江之永矣
漢之廣風詩宜古難宜今

輓監利王子壽

柏心

比部

別號蘧叟

螺山先生天下士豈獨吟壇超眾軌楚越千里悵江深
風雨十年驚電駛憶昔作客游京師讀君文字誦君詩
元龍豪氣人間重冥鴻聲高日下馳自從丙寅來鄂渚

君早歸田解華組楚有三老巋然存

君與漁叟
海年三公

氣味相

投聯縞紵丁卯之秋奉

詔書雕鐫經籍頒鄉閭率蕭

剋暇費搜討擁篲清道迎蒲車校理秘文經七載繙書

日與古賢對誰歟風雅激頽波問難質疑推老輩酒闌

燈地常論心杜老哀時泪滿襟英姿鄂國來酣戰佗僚

靈均發苦吟本是匡時好才調寂寞荒江偏垂釣白髮

誰知舊省郎紅顏羞逐諸年少身雖隱矣道彌尊四方

書幣爛盈門名高北斗襟懷淡人坐春風笑語溫別我

兩年通尺素北堂萱花傷薤露佳兒佳婦繼摧殘又折

孫枝凋玉樹從此茫茫百感生
恰懷身世難爲情鵬鳥無端悲
賈誼龍蛇那信厄康成一夕少
微星忽墮太息人亡琴亦破壇
席名山少替人知己千秋情無
那傷心天竟喪斯文落月屋梁
不見君祇今一曲山陽笛愁向
鶴樓清夜聞

讀江夏張子曙

果

茂才曇華遺集

優曇花現一彈指長吉鬼才今已矣
遺編擎出返魂香鬱律蛟螭走筆底
酒腸如海水東瀉詞名橫壓張子野
烟波江上賦黃鶴陽春至今嗟和寡

作黃鶴樓賦一千七百餘言士林稱道不衰

江夏黃童正英少天胡此醉巫陽召才高賸傳白馬篇
人往空作青蠅弔謝家羣季皆佼佼池塘詩夢吟春草
惠連一去荆花摧莫怪難兄盡懷抱

謂月卿尚書

輓通奉大夫竹溪伯兄

去夏哭嫂淚猶溼故里松楸寒無色豈知今秋更哭兄
痛絕鵠原摧羽翼回憶我兄少壯時芝蘭品格玉丰姿
讀書五夜雖曾引講學三年園不窺十五弱齡初應試
采芹謂如拾芥易螯弧屢拔童子軍霜蹄偏蹶蠻牆地
中歲名場羞角逐援例始納成均粟家政紛紜兼一身

紅羊劫更遭荼毒東西挈眷各奔馳最難骨肉生別離
金穴掘空錢篋罄嗷嗷誰救兒啼飢同治初元滅蛇豕
故巢已被祝融燬窮鳥投林無所栖顛沛流離痛何已
我從京國初南旋泣血空歌陟屺篇同治二年余在京聞計丁內艱南歸
賴有阿兄安窰墓田青草已芊芊隔歲我機皖江棹
兄亦遠來共談笑願隨屈宋作衙官不解催科急租調
同治四年抵皖五年援例授巡檢檄辦大通鹽局次年調辦板子磯釐務七年委署含山運漕鎮巡檢九年署理太湖花封佐續奏絃歌明月清風兩袖多官卑雖壓
縣典史百僚底澤淺能分萬戶波無何疾星嬰二豎習射場中

難負弩陳情乞病卻歸田虛羸冀藉參苓補

十年署太湖典史任

內告

病自皖來鄂剛三年努力加餐病漸痊異鄉欣奏堦

簾樂雖非富貴亦神仙客歲

龍綸頒五色異數頻

膺喜罔極

壬申春勉請封典封通奉大夫

滿擬康強庶期頤胡爲沈

疴悲易簣可憐侍側惟一孫藐是諸孤在里門楚越相

隔三千里何時聞訃與招魂吁嗟乎伯仲七人存者五

那識伯兄復作古念否推梨讓棗人九京有靈淚如雨

今我哭兄知不知撫棺一慟爲哀辭傷心荆樹雪霜白

正是黃楊厄閏期

閏六月十六日仙逝

心齋觀察時將東歸賦詩見示卽步鈞斐吟原韻
以送其行

我將游燕臺君亦別夏口所媿風塵吏不及煙霞叟憶

我與君交同舟八年久其初來鄂時知心幾良友或已

膺封疆或已耕畝畝或已歸道山或已諱奉母

何小宋王耕娛

均任中丞張雲臣告病回蜀陳心泉歿於任所盛旭人劉稚封俱丁內艱歸

風流而雲散相

思空樽酒官居如傳舍鄉歸無何有君初典粵試文光
貫牛斗及再參戎幕營門種綠柳忠勇本性成憤欲剪
羣醜艱苦已備嘗不堪重回首

才同蘇玉局文推張步兵下筆有奇氣萬里極縱橫作
詩雖餘事五言如長城造化究其原能使西人驚科名
有秘訣議論皆持平制藝千百篇意匠費經營士林奉
圭臬足以慰平生耄年猶好學經史滿腹撐弱冠早通
籍遐邇咸知名京外四十年偉望震公卿急流偏勇退
野服忘華纓聞君家濤雖比去眞登瀛

在昔虞世南名論著筆隨今讀歸隱篇詠事如詠史扁
舟游五湖欲學鴟夷子高踪邈難攀清風誰與比白駒
食場藿已得風人旨況有鯉庭賢名才培杞梓媿我戀

萍蓬亦欲歸故里
怙恃兩無依
銜悲登岵岵
今秋兄又
殂
陟岡望已矣
德鄰幸不孤
望衡近尺咫
余寓後府街與糧道署最
近
論文熱辦香
共期垂千祀
一旦送歸帆
魂銷漢江水

退補齋詩存二編目錄

卷二

古體詩

八月二日歐齋邀同張月卿尚書及余游洪山醉
飲遇雨各賦一詩分得籠字

乙亥八月中秋後二日偕月卿尚書穎叔方伯游
赤壁飲二賦堂待月歸宿舟中用東坡遷居臨
皋亭詩韻二首

游寒谿西山用東坡韻 陶公讀書堂丹桂

西山靈泉寺

樊口泛月

乙亥鄉試提調武闈

馬射畢小校場較閱步箭

步射未畢冒雨較射

日校黃德兩郡步射

早起校襄陽士子射

考驗技勇

東坡先生生日

劉幹臣兼善義莊

王母盧孺人題辭

十月初三日五兒宗鄂生

漂母祠志編輯成書有感

退補齋詩存二編卷二 乙亥

古體詩

永康胡鳳丹月樵

八月二日歐齋邀同月卿尚書及余游洪山醉飲
遇雨各賦一詩以碧紗籠三字爲韻分得籠字
拙宦多暇晷侵曉出城東禾苗抽晚綠蓮粉垂衰紅天
旱久不雨颯然來清風感此念故人結伴游梵宮憶昔
楚氛惡滿地生蒿蓬兵火一以靖象教啟龐鴻禪侶俄
雲集鐘鼓振羣聾躋級陟層巔寶塔光熊熊拱揖眾峯
巒俛視兒孫同江湖帶左右秋水彌長空桓桓張尚書

先我到山中獨坐對彌勒靜氣涵淵冲臨崖遲逋仙

謂穎

叔招攜及阿蒙挈榼具肴核歡迎走笑僮調以黃耳菌
佐以紫花菰飛觴日正午雲影忽冥濛疎雨微飄灑流
響鳴孤桐主賓恣談笑既醉開詩倚嗟予胸茅塞境窮
句難工聊記汗漫游塵世謝樊籠

乙亥八月中秋後二日偕月卿尚書穎叔方伯游
赤壁飲二賦堂待月歸宿舟中用東坡遷居臨

皋亭詩韻

斷石高千尺回旋如轉磨風月自古今江山相輔左憶

昔坡仙游飲露秋蟬餓長嘯激江濤掀髯踞石坐距今
八百年光陰彈指過結伴尋鴻爪雪泥印幾箇我生半
落拓有似窮醋馱千金享自嗤萬卷讀未破頌酒敢希
劉論琴恰逢賀醉飲不成吟聊用歌楚些

鄂游已十霜筋力銷馬磨被服慙繡衣窮黎何術左終
年事鉛槧未飽蠹魚餓秋風催故人勝游叨末座切磋
獲三益庶以寡吾過興公藩楚邦知音又一箇

近聞孫琴西擢

藩楚北

承宣藉長材重負滿肩馱

聖朝眷舊臣錄用

格應破霖雨起東山更爲天下賀

謂月卿尚書穎叔方伯

待歌明

月篇安用語些些

游寒谿西山用東坡韻

千條秋柳接疏畦
游人路出武昌西
連山不斷蟠樊口
隔江壓倒古黃泥
異地萍飄同作客
拏舟結伴相招攜
人生行樂知何似
與世沈浮如沙鷺
飛屨登臨陟層巘
尋源絕勝武陵谿
赤壁江橫紅瑪瑙
南湖水浸綠玻璃
子由作記得神妙
文章高於王簡栖
八百餘年橫畧約
遠公去矣畱故蹊
山下有遠公橋
古寺荒涼賸一角
猿鳥悲吟
心目悽亭前九曲
多磊石十步五步
相排擠後游待過

重陽節換茶摘取菊苗齋冠蓋恐被山靈笑薄暮歸來
月一圭

陶公讀書堂後丹桂一株著花矣數百年物也用
東坡定惠院賦海棠詩韻

陶公書堂有古木秀奪一山天使獨金粟如來此化身
幾經劫火超塵俗憶昔烽煙蔽楚湘荆棘蒙茸徧巖谷
淮南小山安在哉今日邱墟昔華屋造物篤生亦無權
材與不材盡魚肉斯堂歸然魯靈光佳樹蔥蘢得氣足
廣寒宮裏第一花人間安得此清淑孤幹扶疎出簷端

深根蟠屈穿巖腹霜皮涵雨傲蒼松勁節凌寒壓綠竹
花葉離離開未開萬斛丹砂炫人目我來緬想長沙勸
北控荆襄西巴蜀威名與桂共千秋雲霄萬古摩天鵠
志乘緣何闕紀載更無騷人歌一曲深山大澤埋異材
振古如茲益振觸

西山靈泉寺訪松風閣試茗菩薩泉用山谷松風
閣詩韻

古寺清幽如輞川萬松深處屋數椽塵容到此一灑然
題名猶記崇甯年崢嶸傑閣逼諸天至今風濤韻野絃

依稀鳴玉漱飛泉山谷老人不世賢
風雷咳唾落四筵我輩才力迴相懸
書生習氣嗤青瑣呼僧且復汲潺湲
井花如雪門清妍粥鼓聲過供齋饌
鬢絲一縷颺輕煙小啜味勝中冷泉
大江蜿蜒盤我前壯遊合借禪榻眠
底用錦帶腰間纏同心況兼有半孿
坐對萬松不忍旋

樊口泛月簡瞿虞甫

廷韶

太守恆獻之

琛

宗子城

景藩

汪子用

曾唯

三明府

輕舟如野鳧恰受人兩三乘月入樊口
鼓櫂恣幽探維時秋正中荻葦花尚含水
光搖空碧萬影納虛涵西山

澄夕霽煙樹隱精藍想見東坡翁尋梅步花南惜哉公
去久末由共清譚載吟水調歌虛谷答舒谿所欣地主
賢送酒時一觴謂黃州府廣市黃岡縣獻之武昌縣子城揮杯邀皓月深情
激江潭持此謝仙吏重遊勿嫌貪

乙亥鄉試提調武闈隨典試翁中丞偕監試張蓉

江之淵

觀察鳳希文

昌

中軍閱馬廐較射馬箭

有感

日趨演武廳旌旆何飛揚末座陪羣公巍煥啟堂皇大
地平如砥下開盤馬場武士咸雲集赳赳雄莫當上馬

復下馬挽弓能挽強耳畔聲蕭蕭騰達羨飛黃得失爭
毫釐妙技誰穿楊我今忝較射玉尺同衡量典試公且
明選擇必精良薄暮方停驂歸鴉噪夕陽

馬射畢小校場較閱步箭

坐對城東隅飛樓高百尺寶塔峙其前容輝煥金碧我
來小校場東方纔露白頻聞呵殿聲四圍列檠戟多士
集如雲中有騰驤客昔者養由基七札能貫革志正而
體直發百中亦百自來善射人絕無矜持迹儻存得失
心英雄亦落魄安命以聽天我心多實獲晷短易推移

倏忽日將夕詰朝復相見勞形徒役役

望後一日步射未畢冒雨較射

睡起天未曉窗前燈影紅僕馬已齊集行色催恩恩前

驅過胭脂

小校場在胭脂山下

雲影涵溟濛天氣漸寒冷連日颺

北風多士冒雨來意氣傑且雄持此命中心挾矢復張
弓得失雖俄頃端由平日功譬彼高飛鳥誰是毛羽豐
優劣懸冰鑑選擇歸大公鼓聲兼雨聲息息咸相通棚
架支蘆葦溼影盪西東試事幸無曠賦此謝蒼穹

日校步射近二百人黃德兩郡善射者百不得一

作此調之

兀坐如枯禪息心入定久抱此掄才心靜觀別妍醜一
鏃相加遺失者恆八九夙無懸蝨功臨場斯掣肘詭遇
詎可憑覲顏呼負負豈無超羣者意氣貫牛斗中鵠匪
爾力得心故應手其如千百中此材稱僅有自古云才
難斯言良不朽

早起校襄陽士子射朝霧迷漫待天霽出闌技藝
較好率筆賦之

宿霧滿城郭如游太古天洪荒猶未開四顧心茫然忽

瞻林木陰晨曦露其顛塵氛一以豁清風颺旌旃入闌
容小憩眼光雲水鮮射者魚貫進相期七札穿審固挾
弓矢持滿恰應弦耳畔聲寥寥一鼓再鼓傳襄陽古名
郡豈徒武士賢叔子遺風在裘帶振翩翩願以告多士
高步追凌煙努力及鋒試載詠鷹揚篇

考驗技司走筆以示多士

舞刀競作花柳石必離地惟有挽強難全力使兩臂自
非萬夫雄操縱詎如志我觀善射者中鵠畢能事舉重
苟若輕神勇今少二乃知造物心生材有深意予齒去

其角兩足擢其翅所以古聖賢用人不求備有短始有
長善取尤善棄登選公且明庶幾千城寄真材無偶遺
請看題名記

東坡先生生日穎叔與余約張月卿彭漁叟張鹿
仙王若農諸公於紫藤仙館爲詩酒會漁叟首
唱七古一章卽席賦答

乙亥嘉平月十九日

仁宗景祐歲丙子我眉仙翁降誕始數宋距今幾輪指
八百三十有三祀老壽儻或齊錢鏐吾儕猶及親杖履
天靳春秋六十六吁嗟仙翁長在矣仙翁雖往仍如生

奎宿炯炯持元精文章光芒照四裔事業卓越垂千齡
伊昔羣小紛媒孽黃州惠州遭挫折彼曹祇今骨化塵
翁名潔過峩眉雪命宮磨蠍亦何傷南箕有舌空簸揚
天待奇才慳大用畱與韓柳相頡頏江上老漁饒韻事
與翁異代同臭味緬懷烏帽舊風流想見負瓢小游戲
今日折柬朋盍簪祝翁初度謀一醉江湖魏闕兩忘形
星聚一堂殊不易官鼓鼙鼙年矢催臘釀初漉梅初胎
心香一瓣肅瞻拜笠檐屐齒神之來神如降止應大笑
座有晉卿富才調老彭有子服早遂京兆佳兒年最少

若農年五十有四漁叟哲嗣器之觀察年五十月卿所
尚書次公子穉珊孝廉年二十均與先生同日生也
生月日皆翁同易世聯情如宿好況復明年太歲合詩
虎酒龍再相召

劉幹臣維楨軍門兼善義莊落成以紀事詩見示

賦此和之

昔我鄉賢公好施篤素志捐貲購義田亦仿義莊意先

夫鄉賢公會置義田爲合邑文童卷資至今鄉里間能道惠文事鄉人私

夫曰惠文先生小子誦清芬德薄愧難嗣茲讀軍門詩愈佩軍

門誼金剛面目嚴菩薩心腸摯猶憶少年時提戈躍單

騎縱橫雄莫當賊膽驚墮地功成衣繡歸光寵鄉隣被
置酒召交遊指困佐乏匱遂令無告民永享仁人利楊
氏咨拔毛視此能無媿鄂中風俗良縉紳多好義往者
陳尚書芝楣制軍樂善莊先置軍門踵而行萬間廈大庇彭
鏗創義學經蒙析以二軍門規益宏厥館拓爲四彭器之觀
察新設經蒙兩義學軍門亦於黃岡本籍捐設四館抱此兼善心飲食教誨備懷
慨本性成吉祥拜天賜庭椿愛日長階樹臨風植從茲
家慶延疊荷國恩賁不見漢于公門大容車駟

王母盧孺人題辭

我友王孝廉北堂有賢母母曰盧孺人清芬韻不朽秀
慧琢瓊瑤勤勞操井臼錦織蘇蕙機絮吟謝庭柳如煙
拜鍼神藻砧揖詩友隔紗縠兼師有叔業親受授荻嚴
濟慈有子薪克負德色泯耰鋤詎言息箕帚豈惟才超
羣抑復德寡偶舉校敬齊眉作羹勤洗手和氣溢門庭
歡心博姑舅鄉鄰無閒言嘖嘖稱孝婦無何黃巾來倉
皇奉姑走顛沛誓相依扶持遑敢後夕膳馨爾肴晨羞
潔爾酒一已甘茹荼忍飢腹欲吼始知孺人賢至性秉
獨厚當其未嫁時父疾厄陽九寸草延春暉剗臂血流

肘焚香額彼蒼和藥獻自牖遂教東海椿永頌南山枸
耿耿一片心堂堂百行首彤管揚遺徽杯棬澤在口孝
廉天下才努力義方守不見瀧岡阡墓表高如阜

十月初三日五兒宗鄂生喜賦

曙星光燦爛羣鷄喔喔鳴問夜猶未央攬衣將待明內
子忽前來謂予五兒生刻漏剛指卯墮地呱呱聲復言
兒狀貌頭角頗崢嶸其母體素羸所幸無震驚胞衣見
紫色是子定奇英我聞一掀髯此功宜分卿匪明樛木
義安得枯楊榮但媿年半百向平累未清老復作牛馬

連慕難爲情撫育兼教誨長大望其成倘能繼文史庶足慰生平時方監鄂試因以爲兒名

時充武闈監試適於是日開考

漂母祠志編輯成書有感

鳥已盡弓可藏兔將死狗先烹嗟嗟淮陰侯一飯之恩不肯忘報以千金願始償區區一飯尚如此此心何忍負漢王

退補齋詩存二編目錄

卷三

古體詩

七月望日鄂江開帆九月二日抵杭作此自慰

重陽前一日赴老龍井祭高伯祖佑順侯墓

祭佑順侯墓畢在戚家午飯作此誌謝

游龍井寺有感
丁丑十月五日舟過富陽

自武林回里舟泊嚴灘有感

讀丁烈婦周安人及丁巡檢妻王孺人殉難節畧

丁丑除夕有感簡筠軒古山譜香少伯敏齋竹舟

松生諸公

題應敏齋方伯申江輿誦圖

退補齋詩存二編卷三

丁丑

古體詩

永康胡鳳丹月樵

七月望日鄂江開帆連日東北風阻滯至九月二日抵杭作此自慰

朝挂漢江帆暮泊古沙口
長江如之江東北風斜走十
日出武黃風狂水又陡
嗚呼逆境人彼蒼不我宥
悶坐舟中行問天徒搔首
舟子半楚人慰我曰否否
吾儕未見公聞公名已久
一片古熱腸陰德積彌厚
誠心金石開臨事肝膽剖
或遇窮困人救援未肯後
惜公手無權

遇事易招咎權務獨任怨臨財得毋苟

楚省大小釐局計四百九十餘

處七年秋間詳撤局卡四百零八處並免省城漢口等門釐十餘處以蘇民困大府建之

刊書惠士

林讐校不停手

同治六年冬檄開書局至今十一年刊成書籍二百三十七種

服官攝

糧儲坦懷祛塵垢明月與清風時時入戶牖天意欲畱

公不離楚左右難捨故依依有如武昌柳我聞舟子言

旨哉能善誘離鄉廿五年烽火遭躪蹂筮仕爲揚名何

以顯父母今日賦歸歟庶可晤親友天遲我不遲人負

我毋負庶合古人心逆來以順受莫怨東北風有爲先

有守歸矣緩緩歸佳期近重九平安抵里門同醉菊花

酒

重陽前一日應敏齋

寶時

方伯約張漱珊

徐鼎

處

士丁松生

丙

明府及余赴老龍井祭高伯祖佑

順侯墓

我自漢江歸先謁龍井墓龍井佑順侯雲孫我忝附厯

今近千載孫枝紛無數竊愧公後人古墓不知處適遇

應仲遠

謂敏齋方伯

興修金錢布更有丁文孝兄弟解囊助

松生因漱珊尋獲古墓轉達敏齋與兄竹舟捐貲相助

若非張茂先

謂漱珊處士

迷津

誰問渡探幽得真蹟揮毫畱妙句

漱珊作二律四絕以紀其事

考核

何精詳吾圉庶以固公昔官杭州閭閻霑雨露惠政畱

甘棠百世有餘慕建廟曰顯應香火千秋炷歿後著神

靈十方受蔭祚士民感公德神像重繪塑咸豐辛酉廟被賊燬今土

民重建以公廟在墓前宋時本無誤逮明宏治後廟趾

乃移駐文正有誌銘夫人陳氏附今日陳誤郎土人鮮

證據范文正公誌銘云公夫人陳氏合葬於龍井今顯應廟內有牌位二一爲佑順侯一爲郎夫人神位

而不知有陳夫人恐以郎誤公墓在武林公孫居寶婺

陳容再考政或添設一位也公之子孫世祭埽久無人雲霾向誰訴何幸遇戚敬謂

居永康庫川大指迷共豁悟尋穴登層嵐扶筇容緩步山徑窈而深

荆棘生滿路忽然開墓道得見暉落塢

老龍井稱暉落塢公墓在焉

當年馬鬣封皆公威靈護儻非舊澤深何以永無斃明日是重陽登高今先赴醉飲茱萸酒共賞山中趣

祭佑順侯墓畢在戚大成家中午飭歸後作此誌
謝並簡敏齋漱珊松生諸公

汲此龍井水烹此龍井茶美哉賢主人異地如一家吾黨二三子乘輿以代車道出茅家埠曲徑如龍蛇入山深復深不聞鳥雀譁祭畢容小憩今昔休咨嗟何處是樂土猿鶴化蟲沙主人屋數椽遠勝在官衙何來不速

客都已拋烏紗

漱珊處士隱居省垣好游山水敏齋方伯去年由蘇臬乞請終養回籍松生明

府由諸生奏保江蘇知縣不赴余亦殷勤具雞黍佐饌自楚東歸今幸同游是天假之緣也

雜魚鰕散持一樽酒禮數益相加不美桃花源此地有

桑麻不慕五柳宅山中多桂花谿九澗十八何須問若

耶獅峯有仙島何必浮靈槎更上風篁嶺穉竹陰周遮

古松拔地起潮聲在山涯入夏圍眾綠淩秋燦羣葩得

此山林樂安用富貴誇相約重來游西山飛暮霞言從

湖畔歸城頭鳴晚鴉

游龍井寺有感簡漱珊松生敏齋諸公

龍井古名勝滿地生荆榛瓦礫如山積徑路無可循猶
幸遇禪侶問道不憂貧結茆以爲屋風雨堪蔽身際此
兵燹餘勝境多沈淪元氣驟難復誰歟來問津在昔全
盛時

翠華適

南巡梵宇增輝煌檐際森

鳳麟亭臺七十二簇簇皆鮮新真山與假山磊塊疊嶙
峩峩巒巒迴合處一一羅奇珍龍井在其左一泓白於銀
水深不盈咫汲可供千人寺前森檠戟巍煥崇 楓宸
當茲萬幾暇游賞徧羣臣

帝歌容唱和四壁煥

絲綸屈指踰百載滿目成煙塵摩挲幾碑碣無

數土中埋世變滄桑感徒為猿鶴嗔今日集吾黨得與
 方外親小憩聆禪語誨我以諄諄自笑髮斑白如已結
 前因經營正覺寺追憶猶勞辛同治己巳重建鄂垣正覺叢林計費二萬餘金
 前後五年功德圓滿今日楚中歸始製五柳巾長謝風塵吏願作
 太平民

丁丑十月五日舟過富陽

富春江水綠於油富春山色清且幽天然圖畫絕粉墨
 癡翁妙筆今猶畱憶我離家廿四載楚雨燕雲互遷代
 面目縱與山靈違心情幸與古人對古人去我千餘年

何以接之憑丹鉛研經讀史竊尚論鉤元提要紛雕鐫
珍藏敢詡名山在幸免沈淪終宦海書囊粗比百牛腰
結習書生還未改今日輕航過富春好山好水又相親
大丹不羨董仙藥雋味惟餐張翰蒔旁觀笑我歸何早
七十致仕方稱老那知勇退須急流不讓春江顏色好
寓居況近西湖山手拖竹杖何其閒私願年年泛江上
醉看紅樹夕陽殷

自武林回里舟泊嚴灘有感

昨日估舟錢江畔錢江星移物亦換今日艤舟嚴陵灘

嚴陵清風高且寒先生似願我來此一日江行三百里
上水誰云行路難中流卻好東風起回憶東風漢江湄
連日打頭舟不移拜浪江豚出復沒波濤澎湃勢偏危
今日東風良不惡天公特慰歸人樂兩山排闥瀧之中
迴合峯巒如鎖鑰斯時正值小春天沿途風景斷復連
深黃柏葉淺紅樹山外夕陽山裏烟烟氛昔日皆烽火
遠近村墟悉罹禍森森古木高參天濃陰蔽虧畱碩果
灘上高峯飛流泉儼如匹練千丈懸南有釣臺北有島
瀧之南有子陵釣臺北有方干島漢宋歷今千百年我獨無端纂小志

探尋名勝一一誌欲訪先生賢子孫停橈待我詢遺事
讀丁烈婦周安人及丁巡檢妻王孺人殉難節畧
作此誌感並簡竹舟松生二君

人生人死爭須臾須臾不死判賢愚死節原非旦夕事

須臾乃成女丈夫

曾文正言死須臾事戴文節公言死非須臾事意各有主然須臾之間一

念偶差卽百年名節喪盡矣余故曰所爭在須臾間也

我讀烈婦傳先紀烈婦年

結褵十九歸丁郎二十三歲沈黃泉志乘煌煌紀婦事

絕世丰神謝珠翠胡爲村落來遊軍見婦竟敢攜婦臂

婦臂可攜婦心已死三出三溺不負此水

紹興府志山陰縣志云順

治三年遊軍入村落見氏美攜其臂去氏至江干遂躍入水賊拯之起須臾復溺如是者三終死於蠶豆橋下夫也聞變渡江歸際茲酷暑流炎暉烈婦死逾三日矣顏面如生世所稀烈婦生前事姑孝姑病乃以指血療阿姑垂危刺十指起死回生立見效烈婦相夫善持家雙雛繞膝聲啞啞不圖遇此紅巾賊未肯須臾一念差夫可拋子可棄白玉不容點塵累可憐死後無人知藁埋蠶豆橋邊地百有七年方請 旌須臾竟貽萬世名

順治三年殉節乾
隆十八年請 旌迄今二百三十又一載傳表紀事皆
名卿道光間仁和邵蕙西公爲傳湘鄉曾文正公爲墓表藏諸祠惜燬於兵火戴文節公紀烈婦事載諸

集
中烈婦身死名不死國初遺烈垂奕穰後來誰效周太

君巡檢之妻曰王氏隨夫遠宦太湖濱四隣城邑俱沈

淪挈眷歸杭被賊虜一剪斷喉全其身王氏錢塘人江蘇同里司巡檢

丁莊妻咸豐十一年由蘇歸杭城陷時匿我今自楚歸

故里得見故人色欣喜痛談往事揚遺徽貞珉久已勒

堂庀竹舟松生弟兄採兩烈婦事吁嗟乎表揚先德非

徒然莫爲之後盛勿傳吾家亦有兩烈婦五弟婦盧氏七弟婦王氏

均於同治元年殉難世亂方知巾幗賢

已請旌專建坊祠
丁丑除夕有感簡筠軒古山譜香少伯敏齋竹舟

松生諸公

去年除夕栖鄂疆裁冠博帶隨趨踰今年除夕歸武林
青鞵白袷抽朝簪人生出處原無定富貴窮通各有命
泉石敢忘廊廟恩退步餘思盡樂境古來名勝誇餘杭
明湖驚嶺今已荒吾黨故人半回里清風明月先翱翔

吳祐灌園不言老

謂笏軒觀察

劉晨入山採瑤草

謂古山觀察

置

驛當時多英豪

謂諸香都轉

獻策仁山負偉抱

謂少伯章京

仲遠

著書首孝經辭官養母鄉里型

謂敏齋方伯

宗臣寶臣恥干

祿經濟文章推二丁

謂竹舟松生昆仲

羣公衮衮梁棟材塵視

軒冕成歸來聽鶯補種蘇公柳招鶴閒尋處士梅憶我
廿年燕楚走倦鶴隨雲歸岫口一家久別今團圞攜樽
共醉屠蘇酒今夕何夕歲將終堂前華燭光熊熊守歲
何堪與歲別天雞唱罷金烏紅

題應敏齋方伯申江輿誦圖

大書深刻德政碑幾年碑仆無人知以口代碑託詩畫
後來別集增去思思君與我郡縣試我年十二君十四
文章小道見經綸識者已占不凡器甲科萃野歌鹿鳴

詔許國子稱先生

登甲辰賢書
國子監學正學錄

欽取

寸雲霖雨及

吳苑寇鋒劫火驚滬城滬城雖是彈丸邑濱海沿江萬
商集千鈞一髮繫東南財力支軍撐半壁須臾化日清
重洋廟堂倚君作海防金銀夜氣識善用獨於富教心
徬徨修明禮樂惟文廟繼軌程朱與張邵龍門書院名小
學導誦絃蠻語方言上海館名互則倣治民徧立常平倉澤
枯瘞朽十萬強潮淤夕塞事疏瀹疾厲免致閭閻傷經
營此意人誰曉畫筆丹青難擬稿三吳秉臬六權藩黍
雨棠風更多少君今去滬逾十年我聽輿誦猶從前
君再起東山望德業常畱天地間